

Abogado ta desmenti culpabilidad di cliente

Ministerio Publico kier pa acusado sinta castigo pa abuso



DIABIerna ultimo, Corte den Prome Instancia a trata e caso penal contra di e acusado E.R.d.M. di 46 aña, kende tabata encarga pa duna deporte na un scol na Savaneta y e ta ser acusa di e tene actonan indebido c'un alumno den e periodo di 2014 te cu 2017.

Un caso sumamente impactante, extremadamente tristo ya cu como consecuencia di e actonan aki di e acusado, e victima, lo a drenta den un estado di depresion ya cu e no por atende cu loke el a wordo sometí na dje.

E acusado manera por a anticipa ta insisti cu e ta inocente y cu e no a haci algo malo cu e victima pero Fiscal den representacion di Ministerio Publico, ta haya cu tin suficiente prueba cu E. ta culpabel di e acusacionnan contra di su persona.

Segun e acusacionnan presenta contra di e acusado aki, ta for di 2014 na momento cu e victima tabatin 11 aña y esaki lo a dura te cu 2017 pero realmente tur cos a bin sali na cla ora cu e famia a nota cu e hoben aki, tabata sufri di depresion formal.

Cu e famia bibando na Hulanda pa algun aña caba, a dicidi di hiba e hoben p'e wordo atendi pa experto y aki a bin descubri e incidente aki cu tanto a afecta e hoben mentalidad.

E expertonan aki a informa e famia cu lo ta miho nan biaha pa Aruba y atende cu su abusado y ta un informacion cu AWEMainta a publica tambe riba dje y loke despues a conduci na detencion di e ayudante di deporte aki na un scol na Savaneta.

Kisas e momento cu mas a cautiva tur hende diabierna mainta, tabata momento cu Mama di e hoben a hiba palabra, a splica Corte y tur presente e lucha cu su yiu a bin ta hibando di loke pasa cu e criatura for di 2014.

No uno pero na cuater ocasion e yiu homber a yega na e limite di lo no kier biba mas cu e peso di e abuso aki riba su consenshi y

esaki a conduci na denuncia contra di e acusado E/ kende sinembargo a nenga na tur momento.

E intervencion di e Mama a pone famia di tanto e hoben como di e acusado, yora p'e desaroyonan cu e victima a bin ta pasa aden y pa Fiscal tabatin suficiente prueba pa haya e persona culpabel di abuso sexual contra e mucha menor di edad.

SOSTEN

Na cos ocasion durante di e investigacion na 2024 na dos adres, autoridad a bin haya algun computer cu a wordo confisca y riba esakinan a bin descubri foto di mucha y hoben bou di 18 aña cu segun Fiscal por wordo considera como "pornografia infantil." Potret saca di un criatura menor di edad carson baha y autoridadnan a bin haya combersacion cu e acusado a hiba c'un mucha homber pa loke ta relacion sexual.

Fiscal a muestra cu tin suficiente prueba cu e trahado di scol aki a abusa di e victima concerni mustrand cu declaracion cu e hoben a duna na autoridad, tabata confiabel ya cu tabata un expresion consistente y caminda el a detaya hopi aspecto di tur loke a sosode.

Na momento cu Fiscal a duna algun detaye di loke a sosode entre e acusado y e victima, esaki a causa un impacto cerca algun presente, principalmente e famianan di e victima.

Mirando tur loke a sosode, Fiscal a pidi Corte pa impone un castigo di 6 aña di prizon kitando e tempo cu e acusado a pasa den detencion preventivo y tambe a pidi pa E. pa un periodo di 11 aña, no por eherce e trabou cu el a bin ta haciendo.

Na mes momento a pidi un compensacion di 25 mil florin p'e victima y famia cu ta pa cubri e gastonan di biahe y estadia pa atende cu e abuso cu a ser cometi contra di e victima.

INOCENTE

E acusado sinembargo a sigui desmenti di a haci algo malo y pa medio di su abogado, a muestra cu no tin suficiente prueba legal y convincente pa condena su cliente E.R.d.M. ya tin solamente declaracion di e hoben contra di su persona.

Abogado a referi n'e hecho cu investigacion haci n'e scol caminda e acusado tabata traha, no a bin haya mas acusacion contra di E. loke ta confirma cu tin solamente e acusacion di e victima contra di su cliente.

Segun abogado Corte tin cu declara e acusado liber ya cu mester ta cauteloso den e tipo di casonan aki ya cu na momento cu no tin suficiente prueba concreto, tin cu declara e acusado liber. Dentro di dos siman Corte lo dicta sentencia den e caso aki.